



Broj: 01-50-1-15-44/17

Sarajevo, 20.4.2017.

PRIMLJENO:		12-05-2017	
Organizaciona jedinica	Klasifikaciona oznaka	Redni broj	Broj priloga

## ZAPISNIK

### 44. sjednice Predstavničkog doma Parlamentarne skupštine Bosne i Hercegovine, održane 20.4.2017.

Sjednica je počela u 10,10 sati. Prisustvovalo je 40 poslanika.

Sjednici su prisustvovali članovi Vijeća ministara BiH, predstavnik Agencije za osiguranje depozita u BiH i Centralne izborne komisije BiH.

Iz međunarodnih organizacija sjednicu su pratili predstavnici OHR-a, EUSR-a, USAID-a, iz nevladinih organizacija prisustvovali su predstavnik CCI-a i Transparency Internationala u BiH, te predstavnici hrvatske, britanske i američke ambasade u BiH.

\*\*\*\*\*

Predsjedavajući Doma Šefik Džaferović rekao je da će poslanicima, u skladu s članom 167. Poslovnika, na početku sjednice, a prije rasprave o dnevnom redu, biti omogućeno postavljanje poslaničkih pitanja u usmenoj formi.

U skladu s članom 168. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- Senad Šepić – predsjedavajućem Vijeća ministara BiH
- Lazar Prodanović – ministru sigurnosti BiH
- Damir Arnaut – ministru vanjskih poslova BiH
- Mirsad Isaković – ministrici za ljudska prava i izbjeglice BiH
- Denis Bećirović – predsjedavajućem Vijeća ministara BiH
- Borislav Bojić - predsjedavajućem Vijeća ministara BiH
- Saša Magazinović - predsjedavajućem Vijeća ministara BiH
- Mensura Beganović – ministru vanjske trgovine i ekonomskih odnosa BiH
- Zaim Backović – Vijeću ministara BiH, ministru finansija BiH i ministru vanjske trgovine i ekonomskih odnosa BiH
- Nikola Lovrinović – ministru pravde BiH
- Jasmin Emrić – Vijeću ministara BiH (Državnoj komisiji za integrirano upravljanje granicom BiH)

**Senad Šepić**

Pitanje postavljeno predsjedavajućem Vijeća ministara BiH: „Da li je Vijeće ministara BiH u ovom mandatu razmatralo, ako jeste, kada i šta su zaključci rasprave, te da li ima ikakav plan za sprečavanje odlaska ljudi iz BiH, posebno mladih?“

Ministar civilnih poslova BiH Adil Osmanović odgovorio je na postavljeno pitanje. Poslanik Senad Šepić komentirao je dati odgovor.

Poslanik Lazar Prodanović nije prisustvovao ovom dijelu sjednice.

**Damir Arnaut**

Pitanje postavljeno ministru vanjskih poslova BiH: „Zbog čega Ministarstvo vanjskih poslova BiH (MVPBiH) još uvijek nije usvojilo pravilnike čije usvajanje od strane Ministarstva vanjskih poslova BiH propisano članom 6. stav (3) i članom 13. stav (1) Odluke Predsjedništva BiH o postupku imenovanja ambasadora i drugih međunarodnih predstavnika Bosne i Hercegovine (“Službeni glasnik BiH”, br. 30/13)?

Ministar vanjskih poslova BiH Igor Crnadak opravdao je svoj izostanak sa sjednice, te je poslao odgovor u pisanoj formi. Poslanik Damir Arnaut izrazio je nezadovoljstvo zbog neprisustva ministra i rekao da će pitanje ponoviti na sljedećoj sjednici na kojoj bude omogućeno postavljanje pitanja u usmenoj formi.

**Mirsad Isaković**

Pitanje postavljeno ministrici za ljudska prava i izbjeglice BiH: „Bosna i Hercegovina je u novembru 2013. godine ratificirala Konvenciju Vijeća Evrope o sprečavanju i borbi protiv nasilja nad ženama i nasilja u porodici, kolokvijalno nazvanu i Istanbulska konvencija, a koja predstavlja prvi pravni obavezujući instrument u Evropi iz ove oblasti, čiji je cilj stvaranje pravnog okvira za prevenciju nasilja nad ženama, zaštita žrtava nasilja i kažnjavanje počinitelja nasilja, čime smo postali šesta zemlja članica Vijeća Evrope koja je ratificirala Konvenciju. Vijeće ministara BiH usvojilo je i Okvirnu strategiju za provođenje Istanbulske konvencije u BiH za period 2015. - 2018. što smo učinili kao prva zemlja u regiji. Poglavljem VIII. Konvencije predviđeno je uspostavljanje mehanizma za praćenje provođenja Konvencije ili GREVIO komitet, sastavljenog od nezavisnih eksperata iz država potpisnica Konvencije, u kojem Bosna i Hercegovina još uvijek nema predstavnike ili predstavnicu. Molim vas da mi odgovorite na pitanje zbog čega još uvijek nije završen postupak nominacije kandidata za ovo značajno tijelo Vijeća Evrope, te kada smatrate da će biti okončan?“

Ministrica za ljudska prava i izbjeglice BiH Semiha Borovac odgovorila je na postavljeno pitanje. Poslanik Mirsad Isaković komentirao je dati odgovor, koji je zatražio u pisanoj formi.

**Denis Bećirović**

Pitanje postavljeno predsjedavajućem Vijeća ministara BiH: „Podsjećam da sam krajem prošle godine predložio Predstavničkom domu Parlamentarne skupštine BiH da usvoji inicijativu kojom obavezuje Vijeće ministara BiH da nam u roku od nepuna tri mjeseca pripremi prijedlog izmjena i dopuna Ustava BiH kojim se osigurava potpuna i dosljedna primjena presude Evropskog suda za ljudska prava u predmetu Sejdić i Finci. Naravno, u raspravi smo tom prilikom jasno ukazali na to da u paketu također treba provesti i presudu

Zornić i presudu Pilav iz 2016. godine. Sada želim reći, dakle, da je to zvanično odluka Parlamenta BiH, nije više pojedinačno inicijativa ni jednog poslanika. Moje pitanje upućeno je predsjedavajućem Vijeća ministara BiH. S obzirom na to da je taj rok istekao – zašto još uvijek na poslaničkim klupama nemamo taj prijedlog, odnosno zašto se još uvijek ne realizira odluka Parlamenta? To posebno pitam zbog toga što smatram da u Bosni i Hercegovini ne postoje pojedinačno neka jednonacionalna pitanja, kako to neki žele predstaviti, već da sve u Bosni i Hercegovini što radite morate računati potpuno ravnopravnim na sve njene naroda i građane, a posebno treba da se fokusiramo na presude Evropskog suda za ljudska prava. U tom smislu javno pitam Vijeće ministara BiH – da li je uopće imalo na dnevnom redu ovu tačku, da li je na bilo koji način pristupilo realizaciji ove jako važne odluke Parlamenta i na koncu šta se čeka pa poslanici to ne dobivaju na poslaničke klupe, tim prije što neki najavljaju da žele parcijalno da dostavljaju neke prijedloge, a da se oglašuju na ono što jeste sada zvanični i važeći zaključak Parlamenta BiH.”<sup>1</sup>

**Predsjedavajući Vijeća ministara BiH Denis Zvizdić nije prisustvovao sjednici, te je poslanik Denis Bećirović zatražio odgovor u pisanoj formi. Također, rekao je da će pitanje ponoviti na prvoj narednoj sjednici na kojoj bude omogućeno postavljanje pitanja u usmeno formi, ako odgovor ne dođe u određenom roku.**

**Borislav Bojić**

Pitanje postavljeno predsjedavajućem Vijeća ministara BiH: „Da li će se pitanje rješavanja problema državljana Bosne i Hercegovine koji su bili zaposleni i nastanjeni u Republici Hrvatskoj, a u periodu od 1991. do 1995. godine su otpušteni s posla, naći kao jedno od otvorenih pitanja na dnevnom redu zajedničke sjednice Vlade Republike Hrvatske i Vijeća ministara BiH, koja će, kako je najavljeno, biti održana u junu ove godine?”

**Ministar civilnih poslova BiH Adil Osmanović odgovorio je na postavljeno pitanje. Poslanik Borislav Bojić komentirao je dati odgovor.**

**Saša Magazinović**

Pitanje postavljeno predsjedavajućem Vijeća ministara BiH: „Moje pitanje trebalo je biti upućeno predsjedavajućem Vijeća ministara BiH gosp. Zvizdiću. On nije tu, ali ja ću postaviti pitanje, pa eventualno ako neko želi iz Vijeća ministara BiH da odgovori, ako ne, nije problem. Pitanje je trebalo biti – da li je njemu važniji zakon ili Bakir Izetbegović?”<sup>2</sup>

**Predsjedavajući Vijeća ministara BiH Denis Zvizdić nije prisustvovao sjednici, te je poslanik Saša Magazinović rekao je da će pitanje ponoviti na prvoj narednoj sjednici na kojoj bude omogućeno postavljanje pitanja u usmeno formi.**

**Mensura Beganović**

Pitanje postavljeno ministru vanjske trgovine i ekonomskih odnosa BiH: „U kojoj fazi je proces pristupanja Bosne i Hercegovine Svjetskoj trgovinskoj organizaciji? Da li su okončani bilateralni pregovori o pristupu tržištu sa SAD-om, Ukrajinom, Ruskom Federacijom i Brazilom? Da li su otklonjeni nedostaci u domaćim propisima na kojima su insistirali

<sup>1</sup> Izvod iz neautoriziranog transkripta 44. sjednice Predstavničkog doma PSBiH

<sup>2</sup> Izvod iz neautoriziranog transkripta 44. sjednice Predstavničkog doma PSBiH

Sekretarijat i pojedine članice WTO-a (zakoni na nivou Bosne i Hercegovine, entiteta i Brčko Distrikta BiH)?“

Ministar vanjske trgovine i ekonomskih odnosa BiH Mirko Šarović odgovorio je na postavljeno pitanje. Poslanica Mensura Beganović komentirala je dati odgovor, koji je zatražila u pisanoj formi.

**Zaim Backović**

Pitanje postavljeno Vijeću ministara BiH, ministru finansija BiH i ministru vanjske trgovine i ekonomskih odnosa BiH: „S obzirom na konstantno ponavljanje o neophodnosti osiguranja uslova za veći priliv stranih ulaganja, da li je navedenim organima i institucijama poznato koliko su strani investitori, pod navodnim znacima, u formi neoporezive dobiti, od dana kada su uložili u Bosnu i Hercegovinu, izvukli iz Bosne i Hercegovine?“

Ministar vanjske trgovine i ekonomskih odnosa BiH Mirko Šarović rekao je da je pitanje kompleksno, da je potrebno kontaktirati više institucija, te da će odgovor dostaviti u pisanoj formi.

**Nikola Lovrinović**

Pitanje postavljeno ministru pravde BiH: „Molim da mi se dostave podaci koliko je presuda izrekao Sud BiH na osnovu odredbi Krivičnog zakona BiH iz 2003. godine za krivična djela počinjena tokom ratnih dešavanja, a nakon presude Evropskog suda u Strazburu u predmetu Maktouf i Damjanović protiv Bosne i Hercegovine od 18.7.2013., kada su podignute optužnice u takvim predmetima i koja je nacionalna struktura osuđenih u takvim predmetima?“

Ministar pravde BiH Josip Grubeša odgovorio je na postavljeno pitanje. Poslanik Nikola Lovrinović kratko je komentirao dati odgovor i zatražio ga u pisanoj formi.

**Jasmin Emrić**

Pitanje postavljeno Vijeću ministara BiH (Državnoj komisiji za integrirano upravljanje granicom BiH): „Zašto Državna komisija za integrirano upravljanje granicom BiH nije odgovorila na moje pitanje koje je postavljeno u pisanoj formi 21.9.2016., te na urgenciju koju sam poslao 10.11.2016.?“

Generalni sekretar Vijeća ministara BiH Zvonimir Kutleša komentirao je ovo pitanje. Poslanik Jasmin Emrić izrazio je nezadovoljstvo time što nije dobio odgovor od Državne komisije i zatražio ga u pisanoj formi.

\*\*\*\*\*

U vezi sa izmjenama i dopunama dnevnog reda sjednice, predsjedavajući Šefik Džaferović napomenuo je sljedeće:

S dnevnog reda skinute su:

**Tačka 11.** - Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini, predlagač: poslanik Damir Arnaut, zakon broj: 01-02-1-687/17, od 10.3.2017. (prvo čitanje), na zahtjev Komisije za saobraćaj i komunikacije;

**Tačka 20.** - Prijedlog izmjena i dopuna Jedinstvenih pravila za izradu pravnih propisa u institucijama Bosne i Hercegovine, predlagač: Ministarstvo pravde BiH, akt broj: 01,02-02-4-566/17, od 22.2.2017., na zahtjev Ustavnopravne komisije.

Na zahtjev Komisije za vanjske poslove skinute su:

**Tačka 23.** - Davanje saglasnosti za ratifikaciju Memoranduma o razumijevanju o obrazovnoj i naučnoj saradnji između Vijeća ministara Bosne i Hercegovine i Vlade Kraljevine Saudijske Arabije, materijal broj: 01,02-05-2-831/17, od 27.3.2017., i

**Tačka 30.** - Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Srbije o međunarodnom drumskom prijevozu putnika i tereta, materijal broj: 01,02-05-2-967/17, od 10.4.2017.

Izmijenjena je tačka 9., koja sada glasi: Prijedlog zakona o dopuni Zakona o upravi, predlagač: poslanik Damir Arnaut, zakon broj: 01-02-1-3044-1/16, od 6.1.2017., sa **Izvještajem Ustavnopravne komisije.**

**U dnevni red dodata je:**

**Tačka 27.** - Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Ruske Federacije o reguliranju obaveza bivšeg SSSR-a po obračunima u vezi s robnim prometom između bivšeg SSSR-a i bivše SFRJ, materijal broj: 01,02-05-2-1007/17, od 13.4.2017.

U raspravi su učestvovali: Damir Arnaut, Mladen Bosić, Šemsudin Mehmedović, Nikola Lovrinović, Aleksandra Pandurević, Momčilo Novaković, Mirsad Đonlagić, Denis Bećirović, Saša Magazinović, Željko Komšić, Fehim Škaljić i Zaim Backović.

Damir Arnaut zatražio je da se vrati tačka koja je skinuta s dnevnog reda na zahtjev Komisije za saobraćaj i komunikacije, koja glasi: Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini, predlagač: poslanik Damir Arnaut. Predsjedavajući je rekao da je Prijedlog zakona skinut s dnevnog reda u skladu s odredbama Poslovnika, te da je Kolegij Doma Komisiji za saobraćaj i komunikacije odobrio rok od 20 dana za dostavljanje mišljenja na Prijedlog zakona.

Denis Bećirović predložio je da se dnevni red sjednice dopuni tačkom: Informacija Vijeća ministara BiH o posljedicama krize Agrokora na ekonomiju u Bosni i Hercegovini. Predsjedavajući je rekao da je stav Kolegija Doma da se od Vijeća ministara BiH zatraži da navedenu informaciju dostave do naredne sjednice Doma. Zatim je ovaj prijedlog dao na glasanje.

Dom je jednoglasno, s 33 glasa „za“ (iz Federacije BiH 25, iz Republike Srpske osam), usvojio ovaj zaključak.

**Željko Komšić** upitao je da li bi neko, u ime predlagača zakona koji su u proceduru upućeni sa zahtjevom za hitni postupak, mogao obrazložiti razloge hitnosti.

Predsjedavajući je konstatirao da 43. sjednica Predstavničkog doma ima sljedeći

## **DNEVNI RED**

1. Usvajanje Zapisnika 43. sjednice Predstavničkog doma Parlamentarne skupštine BiH;
2. Usvajanje Zapisnika 7. hitne sjednice Predstavničkog doma Parlamentarne skupštine BiH;
3. Komentari na dobivene odgovore na poslanička pitanja;
4. Zahtjev poslanika Predraga Kožula za razmatranje Prijedloga zakona o izmjeni i dopunama Zakona o zaštiti i dobrobiti životinja po hitnom postupku, u skladu s članom 133. Poslovnika, zakon broj: 01-02-1-814/17, od 23.3.2017.;
5. Zahtjev Vijeća ministara BiH za razmatranje Prijedloga zakona o izmjenama i dopunama Zakona o akcizama u Bosni i Hercegovini, po hitnom postupku, u skladu s članom 133. Poslovnika, zakon broj: 01,02-02-1-957/17, od 10.4.2017.;
6. Zahtjev Vijeća ministara BiH za razmatranje Prijedloga zakona o izmjeni Zakona o sistemu indirektnog oporezivanja u Bosni i Hercegovini, po hitnom postupku, u skladu s članom 133. Poslovnika, zakon broj: 01,02-02-1-958/17, od 10.4.2017.;
7. Zahtjev Vijeća ministara BiH za razmatranje Prijedloga zakona o izmjenama i dopuni Zakona o uplatama na jedinstveni račun i raspodjeli prihoda, po hitnom postupku, u skladu s članom 133. Poslovnika, zakon broj: 01,02-02-1-959/17, od 10.4.2017.;
8. Zahtjev Vijeća ministara BiH za razmatranje Prijedloga zakona o osiguranju depozita u bankama Bosne i Hercegovine, po hitnom postupku, u skladu s članom 133. Poslovnika, zakon broj: 01,02-02-1-960/17, od 10.4.2017.;
9. Prijedlog zakona o dopuni Zakona o upravi, predlaže: poslanik Damir Arnaut, zakon broj: 01-02-1-3044-1/16, od 6.1.2017., sa Izvještajem Ustavnopravne komisije;
10. Prijedlog zakona o izmjeni Zakona o porezu na dodatu vrijednost, predlaže: Vijeće ministara BiH, zakon broj: 01,02-02-1-2/17, od 26.1. i 3.3.2017. (drugo čitanje);
11. Izvještaj komisije Kolegija o nastojanju za postizanje saglasnosti o Zahtjevu Vijeća ministara BiH za razmatranje Prijedloga zakona o izmjenama i dopunama Zakona o upravi po hitnom postupku, u skladu s članom 133. Poslovnika, zakon broj: 01,02-02-1-770/17, od 20.3.2017.;
12. Izvještaj o radu Agencije za prevenciju korupcije i koordinaciju borbe protiv korupcije za 2016., akt broj: 05/8-04-356/17, od 2.2.2017.;
13. Izvještaj o radu Komisije za izbor i praćenje rada Agencije za prevenciju korupcije i koordinaciju borbe protiv korupcije Parlamentarne skupštine BiH za 2016., akt broj: 01,02-50-14-695/17, od 10.3.2017.;
14. Izvještaj o radu Pravobranilaštva BiH za period od 1.1. do 31.12.2016., akt broj: 01,02,03-10-725/17, od 15.3.2017.;
15. Izvještaj o radu Vijeća nacionalnih manjina BiH za 2016., akt broj: 05/7-50-13-807/17, od 22. 3. 2017.;
16. Izvještaj o provođenju Lokalnih izbora 2016., podnosilac: Centralna izborna komisija BiH, akt broj: 01,02-50-19-660/17, od 7.3.2017.;

17. Izvještaj komisije Klegija o nastojanju za postizanje saglasnosti o prijedlogu zaključka poslanika Jasmina Emrića povodom rasprave o Izvještaju o primjeni Jedinostvenih pravila za izradu pravnih propisa u institucijama Bosne i Hercegovine, podnosilac: Ministarstvo pravde BiH, akt broj: 01,02-02-1-126/17, od 12.1.2017.;
18. Izvještaj komisije Klegija o nastojanju za postizanje saglasnosti o prijedlogu zaključka poslanice Mensure Beganović povodom rasprave o Izvještaju o primjeni Jedinostvenih pravila za izradu pravnih propisa u institucijama Bosne i Hercegovine, podnosilac: Ministarstvo pravde BiH, akt broj: 01,02-02-1-126/17, od 12.1.2017.;
19. Prijedlog mjera i aktivnosti za naredni period kojima se otklanjaju eventualne barijere za postojeća i nova tržišta za proizvode iz BiH, materijal Ministarstva vanjske trgovine i ekonomskih odnosa BiH, akt broj: 01/3-50-3-3-6/15, od 27.1.2017.;
20. Davanje saglasnosti za ratifikaciju protokola uz Sporazum o stabilizaciji i pridruživanju između Bosne i Hercegovine, s jedne strane, i Evropskih zajednica i njihovih država članica, s druge strane, kako bi se uzelo u obzir pristupanje Republike Hrvatske Evropskoj uniji, materijal broj: 01,02-05-2-742/17, od 16.3.2017.;
21. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Narodne Republike Kine o uzajamnom ukidanju viza za nosioce diplomatskih pasoša, službenih pasoša i pasoša za javne poslove, materijal broj: 01,02-05-2-832/17, od 27.3.2017.;
22. Davanje saglasnosti za ratifikaciju Sporazuma između Bosne i Hercegovine i Rumunije o izbjegavanju dvostrukog oporezivanja i sprečavanju utaje poreza u odnosu na poreze na dohodak, materijal broj: 01,02-05-2-833/17, od 27.3.2017.;
23. Davanje saglasnosti za ratifikaciju Sporazuma o finansiranju programa aktivnosti prekogranične saradnje Bosna i Hercegovina – Crna Gora za 2015. godinu između Evropske komisije, Bosne i Hercegovine i Crne Gore, materijal broj: 01,02-05-2-834/17, od 27.3.2017.;
24. Davanje saglasnosti za ratifikaciju Dopune broj 1 Sporazumu o finansiranju koji se tiče državnog programa za Bosnu i Hercegovinu u okviru komponente programa IPA - pomoć u tranziciji i izgradnji institucija za 2016. godinu, materijal broj: 01,02-05-2-880/17, od 31.3.2017.;
25. Davanje saglasnosti za ratifikaciju Sporazuma o zajmu (Projekat modernizacije drumskog sektora u Federaciji Bosne i Hercegovine) između Bosne i Hercegovine i Međunarodne banke za obnovu i razvoj, materijal broj: 01,02-05-2-881/17, od 31.3.2017.;
26. Davanje saglasnosti za ratifikaciju Konvencije o zaštiti migratornih vrsta divljih životinja, materijal broj: 01,02-05-2-885/17, od 3.4.2017.;
27. Davanje saglasnosti za ratificiranje Sporazuma između Vijeća ministara Bosne i Hercegovine i Vlade Ruske Federacije o reguliranju obaveza bivšeg SSSR-a po obračunima u vezi s robnim prometom između bivšeg SSSR-a i bivše SFRJ, materijal broj: 01,02-05-2-1007/17, od 13.4.2017.

\*\*\*\*\*

### **Ad.1. Usvajanje Zapisnika 43. sjednice Predstavničkog doma Parlamentarne skupštine BiH**

Nakon uvodnih napomena, predsjedavajući je otvorio raspravu. Nije bilo prijavljenih.

Zapisnik 43. sjednice usvojen je s 29 glasova „za“ (iz Federacije BiH 21, iz Republike Srpske osam), bez glasova „protiv“ i jednim glasom „suzdržan“.

### **Ad.2. Usvajanje Zapisnika 7. hitne sjednice Predstavničkog doma Parlamentarne skupštine BiH**

Nakon uvodnih napomena, predsjedavajući je otvorio raspravu. Nije bilo prijavljenih.

Zapisnik 7. hitne sjednice usvojen je s 27 glasova „za“ (iz Federacije BiH 19, iz Republike Srpske osam), bez glasova „protiv“ i tri glasa „suzdržan“.

### **Ad.3. Komentari na dobivene odgovore na poslanička pitanja**

Predsjedavajući je podsjetio da su, u skladu s članom 170. Poslovnika, do ove sjednice Doma pitanja u pisanoj formi postavili poslanici:

- Safer Demirović – uputio pitanje Vijeću ministara BiH
- Saša Magazinović – uputio pitanja predsjedavajućem Vijeća ministara BiH, direktoru Uprave za indirektno oporezivanje BiH i članovima Upravnog odbora Uprave za indirektno oporezivanje BiH
- Borjana Krišto – uputila pitanje Ustavnom sudu BiH

Sadržaj postavljenih pitanja je sljedeći:

**Safer Demirović**

Pitanje upućeno Vijeću ministara BiH:

1. „Koje su direktive iz „novog pristupa“ EU preuzete i ugrađene u zakonodavstvo BiH a koje nisu?“

**Saša Magazinović**

Pitanja upućena predsjedavajućem Vijeća ministara BiH, direktoru Uprave za indirektno oporezivanje BiH i članovima Upravnog odbora Uprave za indirektno oporezivanje BiH:

1. „Da li ste razmatrali i ako jeste, kakav je stav o izmjeni Zakona o PDV-u u kontekstu uvođenja sistema plaćanja PDV-a po naplaćenim računima umjesto sadašnjeg sistema plaćanja po izdatim računima za privrednike koji ostvaruju godišnji promet proizvoda i usluga do limita približnog onom u zemljama koje koriste ovaj model naplate PDV-a?“
2. Da li raspolazete podacima o tome kakvi su efekti trenutnog modela naplate PDV-a u kontekstu narušene likvidnosti značajnog broja preduzeća?“
3. Da li raspolazete analizom kakve bi efekte na punjenje budžeta imala izmjena zakona po kojem bi se PDV plaćao po naplaćenom računu?“



**Borjana Krišto**

**Pitanje upućeno Ustavnom sudu BiH:**

1. Poštovani, molim vas da mi odgovorite koliko je Ustavni sud BiH u posljednje dvije godine donio odluka i u donošenju koliko od tih odluka su učestvovalе strane sudije? Također, postavljаm pitanje koliki su ukupno troškovi stranih sudija (uključujući plaće, naknade, smještaj, prijevoz i ostale troškove) u posljednje dvije godine?“

U skladu s članom 170. Poslovnika, na ovoj sjednici Doma pitanja i inicijativu u pisanoj formi postavio je poslanik Denis Bećirović (uputio pitanja predsjedavajućem Vijeća ministara BiH i inicijativu Vijeću ministara BiH).

Sadržaj postavljenih pitanja i inicijative je sljedeći:

**Pitanja upućena Vijeću ministara BiH:**

1. Šta ste konkretno uradili u dosadašnjem dijelu mandata s ciljem povećanja konkurentnosti bh.ekonomije?
2. Šta ste konkretno uradili u dosadašnjem dijelu mandata s ciljem stvaranja povoljnijeg i atraktivnijeg ambijenta za investitore?
3. Šta ste konkretno uradili u dosadašnjem dijelu mandata s ciljem jednostavnijeg poslovanja i osnivanja preduzeća?
4. Šta ste konkretno uradili u dosadašnjem dijelu mandata s ciljem jednostavnijeg poslovanja u smislu bržeg dobivanja građevinskih dozvola, registracije imovine i mogućnosti kreditiranja?
5. Šta ste konkretno uradili u dosadašnjem dijelu mandata s ciljem unapređenja regulative i stvaranja bh. konkurentskih prednosti, kao što su: prirodni resursi, jeftina radna snaga, dobar geostrateški položaj, povoljni klimatski uslovi, stabilna moneta itd., koji su u funkciji planskog razvoja?
6. Šta ste konkretno uradili u dosadašnjem dijelu mandata s ciljem obezbjeđenja energetske stabilnosti?
7. Šta ste konkretno uradili u dosadašnjem dijelu mandata s ciljem izrade potrebnih strategija u oblasti energetike?
8. Šta ste konkretno uradili u dosadašnjem dijelu mandata s ciljem unapređenja poljoprivredne proizvodnje u BiH?
9. Šta ste konkretno uradili u dosadašnjem dijelu mandata s ciljem usvajanja strategije sveobuhvatnog razvoja poljoprivrede u BiH?

**Inicijativa upućena Vijeću ministara BiH:**

„Zadužuje se Vijeće ministara BiH da najkasnije u roku od šest mjeseci od dana usvajanja ove inicijative u Predstavničkom domu Parlamentarne skupštine BiH sačini i u parlamentarnu proceduru dostavi Zakon o kinematografiji Bosne i Hercegovine.“

Predsjedavajući je rekao da su do današnje sjednice dostavljeni sljedeći odgovori na poslanička pitanja:

- Na pitanja poslanika Nikole Špirića, postavljena u pisanoj formi na 38. sjednici, odgovore dostavilo Vijeće ministara BiH

- Na pitanje poslanice **Aleksandre Pandurević**, postavljeno u usmenoj formi na 41. sjednici, odgovor dostavilo Ministarstvo komunikacija i prometa BiH
- Na pitanje poslanice **Maje Gasal-Vražalice**, postavljeno u usmenoj formi na 41. sjednici, i na pitanja postavljena u pisanoj formi na 38. sjednici, odgovore dostavilo Vijeće ministara BiH
- Na pitanje poslanika **Mirsada Donlagića**, postavljeno u usmenoj formi na 42. sjednici, Vijeće ministara BiH prosljedilo odgovor Ministarstva civilnih poslova BiH
- Na pitanje poslanika **Zaima Backovića**, postavljeno u usmenoj formi na 42. sjednici, Vijeće ministara BiH prosljedilo odgovor Ministarstva odbrane BiH
- Na pitanje poslanice **Diane Zelenike**, postavljeno u usmenoj formi na nastavku 42. sjednice, odgovore su dostavili: Vijeće ministara BiH prosljedilo odgovor Ministarstva za ljudska prava i izbjeglice BiH, zatim Federalno ministarstvo prostornog uređenja, Federalno ministarstvo poljoprivrede, vodoprivrede i šumarstva i Federalno ministarstvo kulture i sporta
- Na pitanje poslanika **Nikole Lovrinovića**, postavljeno u usmenoj formi na 42. sjednici, odgovor dostavilo Ministarstvo pravde BiH, te na pitanja postavljena u pisanoj formi na 42. sjednici, odgovore dostavilo Vijeća ministara BiH
- Na pitanje poslanika **Saše Magazinovića**, postavljeno u pisanoj formi na 42. sjednici, odgovore dostavio visoki predstavnik za BiH
- Na pitanje poslanika **Senada Šepića**, postavljeno u pisanoj formi na 43. sjednici, odgovor dostavio Centar za uklanjanje mina u BiH, na pitanje postavljeno u pisanoj formi na 41. sjednici, odgovor dostavilo Federalno ministarstvo zdravstva, te odgovor na dvije inicijative dostavilo Vijeće ministara BiH
- Na pitanje poslanika **Safera Demirovića**, postavljeno u usmenoj formi na 42. sjednici, odgovor dostavilo Ministarstvo vanjske trgovine i ekonomskih odnosa BiH
- Na pitanje poslanika **Amira Fazlića**, postavljeno u usmenoj formi na 42. sjednici, odgovor dostavilo Ministarstvo vanjske trgovine i ekonomskih odnosa BiH
- Na pitanje poslanika **Damira Bećirovića**, postavljeno u pisanoj formi na 38. sjednici, odgovor dostavilo Vijeće ministara BiH
- Na pitanja poslanika **Denisa Bećirovića**, postavljena u pisanoj formi na 42. sjednici, odgovor dostavilo Vijeće ministara BiH
- Na pitanja poslanice **Mensure Beganović**, postavljena u pisanoj formi na 42. sjednici, odgovor dostavilo Vijeće ministara BiH

Dostavljene odgovore komentirali su poslanici:

**Senad Šepić** komentirao je odgovor Federalnog ministarstva zdravstva u vezi s listom čekanja pacijenata. Izrazio je zadovoljstvo odgovorom, ali ne i stanjem u ovoj oblasti.

**Mensura Beganović** zatražila je dostavu odgovora na dopunsko drugo pitanje (upućeno Ministarstvu komunikacija i prometa BiH), od postavljena tri, jer ga nije dobila.

**Saša Magazinović** komentirao je odgovor visokog predstavnika u BiH, te izrazio zadovoljstvo njime.

**Nikola Lovrinović** komentirao je odgovor Ministarstva za ljudska prava i izbjeglice BiH, a u vezi sa stambenim problemom Nevenke Filipović iz Sarajeva.

**Diana Zelenika** izrazila je nezadovoljstvo odgovorom na pitanje u vezi s majorizacijom pripadnika hrvatskog naroda u BiH u sferi jednakopravnosti zapošljavanja u federalnim ministarstvima kao i neravnopravnom raspodjelom budžetskog novca iz tih ministarstava, jer misli da je nepotpun i zatražila od ministrice za ljudska prava i izbjeglice BiH da joj na osnovu odgovora pristiglih iz drugih ministarstava odgovori šta namjerava učiniti radi zaštite ljudskih prava shodno Dejtonskom mirovnom sporazumu.

**Zaim Backović** izrazio je nezadovoljstvo odgovorom Ministarstva odbrane BiH a u vezi s Aneksom 1A (Sporazum o vojnim aspektima mirovnog rješenja), te Aneksom 1B (Sporazum o regionalnoj stabilizaciji) Dejtonskog mirovnog sporazuma.

**Mirsad Donlagić** komentirao je odgovor Ministarstva civilnih poslova BiH u vezi s podacima Svjetske zdravstvene organizacije o zagađenju zraka u BiH.

**Damir Bećirović** komentirao je odgovore pristigle na pitanje o realiziranim putovanjima ministara, zamjenika ministara, savjetnika u kabinetima ministara i zamjenika ministara, pomoćnika ministara i sekretara ministarstava u Vijeću ministara BiH za period od 1.1.2016. do 16.11.2016.

**Ad.4. Zahtjev poslanika Predraga Kožula za razmatranje Prijedloga zakona o izmjeni i dopunama Zakona o zaštiti i dobrobiti životinja po hitnom postupku, u skladu s članom 133. Poslovnika, zakon broj: 01-02-1-814/17, od 23.3.2017.**

Predsjedavajući Šefik Džaferović dao je uvodne napomene i otvorio raspravu o proceduri. U raspravi su učestvovali: Predrag Kožul, Damir Arnaut, Zaim Backović i Salko Sokolović.

Dom je, s 17 glasova „za“ (iz Federacije BiH 11, iz Republike Srpske šest), 16 „protiv“ i šest glasova „suzdržan“, usvojio Zahtjev poslanika Predraga Kožula za razmatranje Prijedloga zakona o izmjeni i dopunama Zakona o zaštiti i dobrobiti životinja po hitnom postupku, u skladu s članom 133. Poslovnika.

Predsjedavajući je otvorio raspravu o Prijedlogu zakona. Diskutirao je Predrag Kožul i predložio Amandman I. na Prijedlog zakona.

Dom se najprije izjašnjavao o prijedlogu Amandmana I. koji glasi:

#### **AMANDMAN I.**

**Član 1. Prijedloga zakona o izmjenama i dopunama Zakona o zaštiti i dobrobiti životinja mijenja se i glasi:**

„U članu 7. Zakona o zaštiti i dobrobiti životinja ('Službeni glasnik BiH', broj 25/09) dodaje se novi stav (2) koji glasi:

'(2) Zabranjen je uzgoj kućnih ljubimaca u svrhu proizvodnje krzna.'“

Amandman I. usvojen je sa 16 glasova „za“ (iz Federacije BiH 11, iz Republike Srpske pet), 12 „protiv“ i devet glasova „suzdržan“, te je postao sastavni dio Prijedloga zakona.

Zatim je Dom, s 19 glasova „za“ (iz Federacije BiH 12, iz Republike Srpske sedam), 14 „protiv“ i četiri glasa „suzdržan“, usvojio Prijedlog zakona o izmjenama i dopunama Zakona o zaštiti i dobrobiti životinja po hitnom postupku.

**Ad.5. Zahtjev Vijeća ministara BiH za razmatranje Prijedloga zakona o izmjenama i dopunama Zakona o akcizama u Bosni i Hercegovini po hitnom postupku, u skladu s članom 133. Poslovnika, zakon broj: 01,02-02-1-957/17, od 10.4.2017.**

Predsjedavajući Šefik Džaferović dao je uvodne napomene i otvorio raspravu o proceduri. U raspravi su učestvovali: Šemsudin Mehmedović, Momčilo Novaković, Damir Arnaut, Saša Magazinović, Senad Šepić, Zaim Backović, Salko Sokolović, Mladen Bosić, Aleksandra Pandurević, Mirsad Donlagić, Miroslav Milovanović, Borislav Bojić, Damir Bećirović, Mensura Beganović, Nikola Lovrinović, Maja Gasal-Vražalica, Mirsad Isaković, Diana Zelenika, Fehim Škaljić, Sadik Ahmetović, Nenad Lalić i Amir Fazlić.

Zaključke su u raspravi predložili: Šemsudin Mehmedović i Sadik Ahmetović, Senad Šepić, te Nikola Lovrinović.

Nakon rasprave predsjedavajući je dao na glasanje prijedlog da se prvo glasa o prijedlozima zaključaka podnesenim u raspravi.

„Za“ prijedlog je glasalo 15 poslanika (iz Federacije BiH 14, iz Republike Srpske jedan), „protiv“ je bilo 25, bez glasova „suzdržan“. Predsjedavajući je konstatirao da nema opće većine, te da prijedlog nije usvojen.

Prešlo se na glasanje o Zahtjevu Vijeća ministara BiH za razmatranje Prijedloga zakona o izmjenama i dopunama Zakona o akcizama u Bosni i Hercegovini po hitnom postupku, u skladu s članom 133. Poslovnika. „Za“ zahtjev je glasalo 19 poslanika (iz Federacije BiH 13, iz Republike Srpske šest), „protiv“ je bilo 19, dva „suzdržana“. Predsjedavajući je konstatirao da Zahtjev za hitni postupak nije usvojen.

Prešlo se na glasanje o skraćenoj proceduri. „Za“ je glasao 21 poslanik (iz Federacije BiH 14, iz Republike Srpske sedam), 19 „protiv“, bez glasova „suzdržan“. Predsjedavajući je konstatirao da će se Prijedlog zakona o izmjenama i dopunama Zakona o akcizama u Bosni i Hercegovini razmatrati u skladu s odredbama kojima se regulira skraćeni zakonodavni postupak.

**Ad.6. Zahtjev Vijeća ministara BiH za razmatranje Prijedloga zakona o izmjeni Zakona o sistemu indirektnog oporezivanja u Bosni i Hercegovini, po hitnom postupku, u skladu s članom 133. Poslovnika, zakon broj: 01,02-02-1-958/17, od 10.4.2017.**

Predsjedavajući je dao uvodne napomene i otvorio raspravu o proceduri. Nije bilo prijavljenih.

Prešlo se na glasanje o Zahtjevu Vijeća ministara BiH za razmatranje Prijedloga zakona o izmjeni Zakona o sistemu indirektnog oporezivanja u Bosni i Hercegovini po hitnom postupku, u skladu s članom 133. Poslovnika. „Za“ zahtjev je glasalo 19 poslanika

(iz Federacije BiH 13, iz Republike Srpske šest), „protiv“ je bilo 19, dva „suzdržana“. Predsjedavajući je konstatirao da Zahtjev za hitni postupak **nije usvojen**.

Prešlo se na glasanje o skraćenoj proceduri. „Za“ je glasao 21 poslanik (iz Federacije BiH 14, iz Republike Srpske sedam), 18 „protiv“, jedan „suzdržan“. Predsjedavajući je konstatirao da će se Prijedlog zakona o izmjeni Zakona o sistemu indirektnog oporezivanja u Bosni i Hercegovini razmatrati u skladu s odredbama kojima se regulira **skraćeni** zakonodavni postupak.

**Ad.7. Zahtjev Vijeća ministara BiH za razmatranje Prijedloga zakona o izmjenama i dopuni Zakona o uplatama na Jedinostveni račun i raspodjeli prihoda, po hitnom postupku, u skladu s članom 133. Poslovnika, zakon broj: 01,02-02-1-959/17, od 10.4.2017.**

Predsjedavajući je dao uvodne napomene i otvorio raspravu o proceduri. Nije bilo prijavljenih.

Prešlo se na glasanje o Zahtjevu Vijeća ministara BiH za razmatranje Prijedloga zakona o izmjenama i dopuni Zakona o uplatama na jedinstveni račun i raspodjeli prihoda po hitnom postupku, u skladu s članom 133. Poslovnika. „Za“ zahtjev je glasalo 19 poslanika (iz Federacije BiH 13, iz Republike Srpske šest), „protiv“ je bilo 19, dva „suzdržana“. Predsjedavajući je konstatirao da Zahtjev za hitni postupak **nije usvojen**.

Prešlo se na glasanje o skraćenoj proceduri. „Za“ je glasao 21 poslanik (iz Federacije BiH 14, iz Republike Srpske sedam), 19 „protiv“, bez glasova „suzdržan“. Predsjedavajući je konstatirao da će se Prijedlog zakona o izmjenama i dopuni Zakona o uplatama na Jedinostveni račun i raspodjeli prihoda razmatrati u skladu s odredbama kojima se regulira **skraćeni** zakonodavni postupak.

**Ad.8. Zahtjev Vijeća ministara BiH za razmatranje Prijedloga zakona o osiguranju depozita u bankama Bosne i Hercegovine, po hitnom postupku, u skladu s članom 133. Poslovnika, zakon broj: 01,02-02-1-960/17, od 10.4. 2017.**

Predsjedavajući je dao uvodne napomene i otvorio raspravu o proceduri. Nije bilo prijavljenih.

Prešlo se na glasanje o Zahtjevu Vijeća ministara BiH za razmatranje Prijedloga zakona o osiguranju depozita u bankama Bosne i Hercegovine po hitnom postupku, u skladu s članom 133. Poslovnika. „Za“ zahtjev je glasalo 19 poslanika (iz Federacije BiH 13, iz Republike Srpske šest), „protiv“ je bilo 19, dva „suzdržana“. Predsjedavajući je konstatirao da Zahtjev za hitni postupak **nije usvojen**.

Prešlo se na glasanje o skraćenoj proceduri. „Za“ je glasalo 20 poslanika (iz Federacije BiH 14, iz Republike Srpske šest), 19 „protiv“, jedan „suzdržan“. Predsjedavajući je konstatirao da će se Prijedlog zakona o osiguranju depozita u bankama Bosne i Hercegovine razmatrati u skladu s odredbama kojima se regulira **skraćeni** zakonodavni postupak.

**Ad.9. Prijedlog zakona o dopuni Zakona o upravi, predlađač: poslanik Damir Arnaut, zakon broj: 01-02-1-3044-1/16, od 6.1.2017., sa Izvještajem Ustavnopravne komisije**

Predsjedavajući je dao uvodne napomene i otvorio raspravu. Diskutirao je Damir Arnaut.

Dom, s 11 glasova „za“ (iz Federacije BiH četiri, iz Republike Srpske sedam), 17 „protiv“ i tri glasa „suzdržan“, nije usvojio negativan Izvještaj Ustavnopravne komisije, te je Komisija zadužena da dostavi novi izvještaj, u skladu s članom 121. stav (3) Poslovnika.

**Ad.10. Prijedlog zakona o izmjeni Zakona o porezu na dodatu vrijednost, predlađač: Vijeće ministara BiH, zakon broj: 01,02-02-1-2/17, od 26.1. i 3.3.2017. (drugo čitanje)**

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 28 glasova „za“ (iz Federacije BiH 20, iz Republike Srpske osam), bez glasova „protiv“ i tri glasa „suzdržan“, usvojio u drugom čitanju Prijedlog zakona o izmjeni Zakona o porezu na dodatu vrijednost.

**Ad.11. Izvještaj komisije Kolegija o nastojanju za postizanje saglasnosti o Zahtjevu Vijeća ministara BiH za razmatranje Prijedloga zakona o izmjenama i dopunama Zakona o upravi po hitnom postupku, u skladu s članom 133. Poslovnika, zakon broj: 01,02-02-1-770/17, od 20.3.2017.**

Predsjedavajući je dao uvodne napomene. Nije bilo rasprave o ovoj tački dnevnog reda.

Dom, sa osam glasova „za“, devet „protiv“ (iz Federacije BiH tri, iz Republike Srpske šest) i osam glasova „suzdržan“, u drugom krugu glasanja nije usvojio Zahtjev Vijeća ministara BiH za razmatranje Prijedloga zakona o izmjenama i dopunama Zakona o upravi po hitnom postupku.

Prešlo se na glasanje o skraćenoj proceduri. „Za“ je glasalo osam poslanika (iz Federacije BiH), devet „protiv“, osam ih je bilo „suzdržano“. Predsjedavajući je konstatirao da nema opće većine, te da će se Prijedlog zakona o izmjenama i dopunama Zakona o upravi razmatrati u skladu s odredbama kojima se regulira redovni zakonodavni postupak.

**Ad.12. Izvještaj o radu Agencije za prevenciju korupcije i koordinaciju borbe protiv korupcije za 2016., akt broj: 05/8-04-356/17, od 2.2.2017.**

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 23 glasa „za“ (iz Federacije BiH 15, iz Republike Srpske osam), bez glasova „protiv“ i osam glasova „suzdržan“, usvojio Izvještaj o radu Agencije za prevenciju korupcije

i koordinaciju borbe protiv korupcije za 2016. sa zaključcima sadržanim u Izvještaju. Zaključci glase:

- 1. Usvaja se Izvještaj o radu Agencije za prevenciju korupcije i koordinaciju borbe protiv korupcije za period od 1.1. do 31.12.2016.*
- 2. Daje se puna podrška daljnjim naporima Agencije za prevenciju korupcije i koordinaciju borbe protiv korupcije, s ciljem unapređenja prevencije korupcije i koordinacije borbe protiv korupcije.*
- 3. Daje se puna podrška daljnjim naporima Agencije za prevenciju korupcije i koordinaciju borbe protiv korupcije da, u skladu sa zakonskim nadležnostima, kontinuirano inicira i koordinira provođenje aktivnosti koje proizlaze iz Strategije i Akcionog plana.*
- 4. Zadužuje se Vijeće ministara BiH da podrži svaku aktivnost Agencije za prevenciju korupcije i koordinaciju borbe protiv korupcije u provođenju Strategije za borbu protiv korupcije za period 2015. – 2019. godina i Akcionog plana za njeno provođenje.*
- 5. Zadužuje se Vijeće ministara BiH da pruži svu neophodnu tehničku, organizacionu i finansijsku pomoć Agenciji za prevenciju korupcije i koordinaciju borbe protiv korupcije u rješavanju njenog materijalno-tehničkog opremanja i kadrovskog popunjavanja, s ciljem efikasnog rada ove agencije.*

**Ad.13. Izvještaj o radu Komisije za izbor i praćenje rada Agencije za prevenciju korupcije i koordinaciju borbe protiv korupcije Parlamentarne skupštine BiH za 2016., akt broj: 01,02-50-14-695/17, od 10.3.2017.**

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 23 glasa „za“ (iz Federacije BiH 15, iz Republike Srpske osam), bez glasova „protiv“ i osam glasova „suzdržan“, usvojio Izvještaj o radu Komisije za izbor i praćenje rada Agencije za prevenciju korupcije i koordinaciju borbe protiv korupcije Parlamentarne skupštine BiH za 2016.

**Ad.14. Izvještaj o radu Pravobranilaštva BiH za period od 1.1. do 31.12.2016., akt broj: 01,02,03-10-725/17, od 15.3.2017.**

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 23 glasa „za“ (iz Federacije BiH 15, iz Republike Srpske osam), šest „protiv“ i osam glasova „suzdržan“, usvojio Izvještaj o radu Pravobranilaštva BiH za period od 1.1. do 31.12.2016.

**Ad.15. Izvještaj o radu Vijeća nacionalnih manjina BiH za 2016., akt broj: 05/7-50-13-807/17, od 22. 3. 2017.**

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 27 glasova „za“ (iz Federacije BiH 19, iz Republike Srpske osam), bez glasova „protiv“ i četiri glasa „suzdržan“, usvojio Izvještaj o radu Vijeća nacionalnih manjina BiH za 2016.

**Ad.16. Izvještaj o provođenju Lokalnih izbora 2016., podnosilac: Centralna izborna komisija BiH, akt broj: 01,02-50-19-660/17, od 7.3.2017.**

Predsjedavajući je dao uvodne napomene i otvorio raspravu. Nije bilo prijavljenih.

Domu se obratila Irena Hadžiabdić, predsjednica Centralne izborne komisije Bosne i Hercegovine.

Dom je, s 24 glasa „za“ (iz Federacije BiH 17, iz Republike Srpske sedam), bez glasova „protiv“ i sedam glasova „suzdržan“, usvojio Izvještaj o provođenju Lokalnih izbora 2016.

**Ad.17. Izvještaj komisije Kolegija o nastojanju za postizanje saglasnosti o prijedlogu zaključka poslanika Jasmina Emrića povodom rasprave o Izvještaju o primjeni Jedinostvenih pravila za izradu pravnih propisa u institucijama Bosne i Hercegovine, podnosilac: Ministarstvo pravde BiH, akt broj: 01,02-02-1-126/17, od 12.1.2017.**

Predsjedavajući je dao uvodne napomene. Nije bilo rasprave o ovoj tački dnevnog reda.

Dom je, s 26 glasova „za“, četiri „protiv“ (iz Federacije BiH) i jednim glasom „suzdržan“, u drugom krugu glasanja usvojio prijedlog zaključka poslanika Jasmina Emrića povodom rasprave o Izvještaju o primjeni Jedinostvenih pravila za izradu pravnih propisa u institucijama Bosne i Hercegovine, koji glasi: *„Zadužuje se Kolegij Sekretarijata da izradi plan stručnog osposobljavanja i usavršavanja zaposlenih u Zakonodavno-pravnom sektoru, te ostalih državnih službenika koji su neposredno uključeni u zakonodavni proces, uz prethodno donošenje akata kojim bi se definirali uslovi i način ostvarivanja prava na kontinuiranu profesionalnu edukaciju.“*

**Ad.18. Izvještaj komisije Kolegija o nastojanju za postizanje saglasnosti o prijedlogu zaključaka poslanice Mensure Beganović povodom rasprave o Izvještaju o primjeni Jedinostvenih pravila za izradu pravnih propisa u institucijama Bosne i Hercegovine, podnosilac: Ministarstvo pravde BiH, akt broj: 01,02-02-1-126/17, od 12.1.2017.**

Predsjedavajući je dao uvodne napomene. Nije bilo rasprave o ovoj tački dnevnog reda.

Dom je, s 25 glasova „za“, tri „protiv“ (iz Federacije BiH) i tri glasa „suzdržan“, u drugom krugu glasanja usvojio prijedlog zaključaka poslanice Mensure Beganović povodom



rasprave o Izvještaju o primjeni Jedinostvenih pravila za izradu pravnih propisa u institucijama Bosne i Hercegovine, koji glase:

- 1. Zadužuju se Zakonodavno-pravni sektor i ustavnopravne komisije Predstavničkog doma i Doma naroda da pripreme izmjene i dopune Jedinostvenih pravila za izradu pravnih propisa u institucijama BiH (u daljnjem tekstu: Jedinostvena pravila) i dostave ih PSBiH na usvajanje, tako da:**
  - u Jedinostvena pravila ugrade odredbe oba poslovnika domova Parlamentarne skupštine BiH, konkretno – šta prijedlog zakona treba da sadrži,
  - izmijene i dopune Jedinostvena pravila dodatnim pojašnjenjima i razradom nedovoljno jasnih i preciznih normi,
  - Jedinostvena pravila dopune odredbama kojima se regulira utvrđivanje službene i neslužbene verzije prečišćenog teksta zakona, odnosno da se propiše obavezna novelacija/kodifikacija teksta zakona koji je pretrpio veći broj izmjena/dopuna kako bi se olakšala njegova primjena u jednom konsolidiranom tekstu zakona, a koji bi Parlamentarna skupština BiH usvojila po hitnom postupku.
- 2. Zadužuje se Ministarstvo pravde BiH da pripremi zaseban akt o procedurama i metodama procjene učinka propisa, kojim se poboljšava kvalitet sadržaja propisa i kao takav je nezavisan od Jedinostvenih pravila kojima se propisuju nomotehnička pravila.**
- 3. Zadužuje se Zakonodavno-pravni sektor da, u saradnji sa sekretarima ustavnopravnih komisija Predstavničkog doma i Doma naroda, jednom godišnje provede obuku za državne službenike koji obavljaju normativno-pravne poslove u Sekretarijatu Parlamentarne skupštine BiH o temi primjene Jedinostvenih pravila.**
- 4. Zadužuje se Kolegij Sekretarijata da osigura potrebne kapacitete za izradu propisa tako da državnim službenicima koji rade na normativnim poslovima osigura pohađanje obuka, radi daljnjeg usavršavanja i unapređivanja znanja iz njihove nadležnosti.**
- 5. Zadužuje se Vijeće ministara BiH da osigura/intenzivira saradnju između pravnih i jezičkih stručnjaka s ciljem jačanja sistema pravno-lingvističke provjere u postupku izrade pravnih propisa u BiH.**

**Ad.19. Prijedlog mjera i aktivnosti za naredni period kojima se otklanjaju eventualne barijere za postojeća i nova tržišta za proizvode iz BiH, materijal Ministarstva vanjske trgovine i ekonomskih odnosa BiH, akt broj: 01/3-50-3-3-6/15, od 27.1.2017.**

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 27 glasova „za“ (iz Federacije BiH 19, iz Republike Srpske osam), bez glasova „protiv“ i četiri glasa „suzdržan“, primio k znanju Prijedlog mjera i aktivnosti za naredni period kojima se otklanjaju eventualne barijere za postojeća i nova tržišta za proizvode iz BiH.

Na prijedlog Amira Fazlića, tačka 27. Davanje saglasnosti za ratificiranje Sporazuma između Vijeća ministara Bosne i Hercegovine i Vlade Ruske Federacije o reguliranju obaveza bivšeg SSSR-a po obračunima u vezi s robnim prometom između bivšeg SSSR-a i

bivše SFRJ, materijal broj: 01,02-05-2-1007/17, od 13.4.2017., razmatrat će se zasebno, ne u objedinjenoj raspravi.

Prije prelaska na sljedeću tačku dnevnog reda, predsjedavajući je dao na glasanje prijedlog da se objedini rasprava o tačkama 20. - 26. dnevnog reda, s obzirom na to da je riječ o davanju saglasnosti za ratifikaciju sporazuma i konvencije.

Prijedlog je usvojen s 22 glasa „za“ (iz Federacije BiH 17, iz Republike Srpske pet), jednim „protiv“ i jednim glasom „suzdržan“.

#### **Ad. 20. - 26.**

Predsjedavajući je dao uvodne napomene i otvorio raspravu. Nije bilo prijavljenih.

**Ad. 27. Davanje saglasnosti za ratificiranje Sporazuma između Vijeća ministara Bosne i Hercegovine i Vlade Ruske Federacije o reguliranju obaveza bivšeg SSSR-a po obračunima u vezi s robnim prometom između bivšeg SSSR-a i bivše SFRJ, materijal broj: 01,02-05-2-1007/17, od 13.4.2017.**

Nakon uvodnih napomena predsjedavajućeg, otvorena je rasprava. Nije bilo prijavljenih.

Predsjedavajući je dao na glasanje prijedlog da se objedini izjašnjavanje o tačkama 20. - 27. Dom je, s 33 glasa „za“, (iz Federacije BiH 19, iz Republike Srpske 14), dva „protiv“ i dva glasa „suzdržan“, usvojio ovaj prijedlog.

Zatim je Dom, s 34 glasa „za“ (iz Federacije BiH 20, iz Republike Srpske 14), jednim „protiv“ i dva „suzdržan“, dao saglasnost za ratifikaciju:

- Protokola uz Sporazum o stabilizaciji i pridruživanju između Bosne i Hercegovine, s jedne strane, i Evropskih zajednica i njihovih država članica, s druge strane, kako bi se uzelo u obzir pristupanje Republike Hrvatske Evropskoj uniji,
- Sporazuma između Vijeća ministara Bosne i Hercegovine i Vlade Narodne Republike Kine o uzajamnom ukidanju viza za nosioce diplomatskih pasoša, službenih pasoša i pasoša za javne poslove,
- Sporazuma između Bosne i Hercegovine i Rumunije o izbjegavanju dvostrukog oporezivanja i sprečavanju utaje poreza u odnosu na poreze na dohodak,
- Sporazuma o finansiranju programa aktivnosti prekogranične saradnje Bosna i Hercegovina – Crna Gora za 2015. godinu između Evropske komisije, Bosne i Hercegovine i Crne Gore,
- Dopune broj 1 Sporazumu o finansiranju koji se tiče državnog programa za Bosnu i Hercegovinu u okviru komponente programa IPA - pomoć u tranziciji i izgradnji institucija za 2016. godinu,

- Sporazuma o zajmu (Projekat modernizacije drumskog sektora u Federaciji Bosne i Hercegovine) između Bosne i Hercegovine i Međunarodne banke za obnovu i razvoj,
- Konvencije o zaštiti migratornih vrsta divljih životinja i
- Sporazuma između Vijeća ministara Bosne i Hercegovine i Vlade Ruske Federacije o reguliranju obaveza bivšeg SSSR-a po obračunima u vezi s robnim prometom između bivšeg SSSR-a i bivše SFRJ.

Sjednica je završena u 17,50 sati.

Sastavni dio Zapisnika je transkript 44. sjednice Predstavničkog doma.

SEKRETAR  
PREDSTAVNIČKOG DOMA

*Marin Vukotić*

PREDSJEDAVAJUĆI  
PREDSTAVNIČKOG DOMA

Šefik Džaferović

*Šefik Džaferović*

